

Berita Harian
13 January 2016

Takaful Suria lengkapi persediaan haji, umrah

CIMB Islamic Bank dengan kerjasama Sun Life Malaysia Takaful Bhd melancarkan produk takaful terbaharunya, Takaful Suria, produk takaful haji universal yang pertama seumpamanya ditawarkan di pasaran.

Dibangunkan secara eksklusif oleh Sun Life Malaysia Takaful, produk terbaharu itu menyediakan perlindungan, simpanan dan fleksibiliti kewangan dalam membantu umat Islam menunaikan ibadat haji dan umrah.

Produk inovatif itu juga menyediakan bayaran khas berjumlah RM1,500 yang akan dibayar selepas tahun ketiga kontrak untuk membuka akaun Tabung Haji atau menambah simpanan sedia ada.

Beri pulangan beransur-ansur

Ketua Pegawai Eksekutif Sun Life Malaysia Takaful, Muhammad Fikri Mohamad Rawi, berkata produk baharu itu mempunyai penstabil yang akan memberi pulangan secara beransur-ansur yang mana



Rafe (kiri) bersama Muhammad Fikri pada majlis **pelancaran Takaful Suria** di Kuala Lumpur, semalam. (FOTO SADDAM YUSOF/BH)

tidak seperti insurans konvensional yang lebih terdedah kepada turun naik pasaran.

"Dengan Takaful Suria, kami boleh memberi jaminan itu, di samping melengkapi persediaan haji/umrah bagi pelanggan," katanya pada sidang media selepas pelancaran Takaful Suria di Kuala Lumpur, semalam.

Sambutan menggalakkan

Mengenai sambutan terhadap produk takaful inovatif itu, Ketua Pegawai Eksekutif CIMB Islamic, Rafe Haneeff berkata, sejak pelancaran awal produk berkenaan pada November tahun lalu, kira-kira 1,000 orang sudah menjadi pemegang polisinya.

Justeru, kata beliau, pihaknya menjangkakan Takaful Suria akan mendapat sambutan menggalakkan bersandarkan manfaat menarik yang ditawarkan.

Takaful Suria mempunyai manfaat akhir yang mana nilai akaun universal akan dibayar pada akhir

tamat kontrak. Sebagai perlindungan, ia menggandakan manfaat asas yang mana membabitkan manfaat kematian/hilang upaya menyeluruh dan kekal semasa menunaikan haji/umrah.

Malah, pemegang polisi takaful inovatif itu juga berpeluang menikmati manfaat perbelanjaan pengembalian RM3,000 dan manfaat Badal Haji sekiranya berlaku kematian atau pemegang polisi tidak mampu untuk menunaikan ibadat haji secara fizikal.

Ia akibat mengalami hilang upaya menyeluruh atau kekal atau menghadapi salah satu daripada 36 penyakit kritikal.

Takaful Suria boleh dilanggan di semua cawangan CIMB Bank dan CIMB Islamic Bank di seluruh negara.

Mengenai prestasi industri takaful, Fikri berkata, kadar penembusan takaful di negara ini adalah sekitar 13 peratus daripada 54 peratus kadar penembusan keseluruhan insurans dan takaful.